



# TEZAUUR LITURGIC

28 MARTIE

# ACATISTUL SF. CUVIOS ILARION DE LA PSKOVVOEZERSK



MOSCOVA, 2000



**Акафист**  
**святому преподобному**  
**Илариону, Псковоезерскому**  
**чудотворцу**

**Кондак 1**

---

Возбранному подвижнику от Господа Сил, вечною славою достойно увенчанному, яко препобедившему в житии своем суетную мира сего прелесть и стяжавшему преизобильную Духа Святаго благодать, похвальное пение приносим ти, чтуще твою память, блаженне Иларионе, ты же яко имеяй дерзновение ко Господу, от всяких бед свободдай нас, зовущих ти:

Радуйся, преподобне Иларионе, отче наш милостивый.

**Икос 1**

---

Ангелом, непрестанно на Небеси славящим Творца и Владыку всех Бога, уподобился еси на земли, блаженне Иларионе: тину бо страстей

плотских отряс и в ризу чистоты светлейшую облекся еси, быв воистинну во плоти ангел. Тем же и ныне в небесных чертозах со ангелы и всеми святыми ликовствуя, радуешься нетленною радостью и веселишися светло. Мы же яко дивнаго угодника Божия тя почитающе, зовем ти:

Радуйся, ангелов невещественнаго пребывания ревнителю.

Радуйся, благий и верный Царя Славы Господа служителю.

Радуйся, ангелов достойный собеседниче.

Радуйся, славы святых сонаследниче.

Радуйся, праведных сподвижниче.

Радуйся, мучеников сопричастниче.

Радуйся, яко Царю Небесному предстоя, о всех нас тепле к Нему ходатайствуеши.

Радуйся, яко благоутробие Его о всех чтущих память твою, умилоствляеши.

Радуйся, преподобне Иларионе, отче наш МИЛОСТИВЫЙ.

## Кондак 2

---

Видя преходящаго и тленнаго мира сего суету, причастник быти нестареющия и вечныя жизни вождедел еси, сего ради дом твой и Отечество оставив, во обитель дивнаго Евфросина притекл еси, поя присносущному Богу: Аллилуиа.

## Икос 2

---

Разум горний разумети ища, плотский разум отверг еси: постом и молитвою страсти плотския умертвив, дух твой к приятию божественныя истины уготовал еси, темже божественнаго разума огнем душу просветив, во всем подражатель Христу был еси. В том же убо разуме настави и нас, зовущих ти:

Радуйся, мир и вся его прелести оставивый.

Радуйся, горнее Отечество обретый.

Радуйся, к Богу разум твой превозвысивый.

Радуйся, горнее любомудрие возлюбивый.

Радуйся, телесныя любве удаливыйся.

Радуйся, Богу Всещедрому присвоивыйся.

Радуйся, яко во благочестии жити нас возбуждаеши.

Радуйся, яко на путь спасения нас наставляеши.

Радуйся, преподобне Иларионе, отче наш милостивый.

### **Кондак 3**

---

Силою свыше укрепляемь, демонския козни сокрушил еси, блаженне, крестом бо вооруживыйся, егоже образ в сердца своем всадил еси, мрачныя силы вражия силою того дерзостно сокрушил еси, поя укрепляющему тя Богу: Аллилуиа.

### **Икос 3**

---

Имея ревность многу о Господе во еже Ему Единому послужити, всякаго мирскаго пристрастия чужд был еси, отвергся бо себе и взем крест свой последовал еси Христу: душу же твою Христа ради и Евангелиа отщетив, тем убо спасал еси ю. Сего ради ублажающе тя вопием:

Радуйся, Господеви поработати пламенне вожделевый.

Радуйся, Христа паче всех возлюбивый.

Радуйся, от юности Христу последовавый.

Радуйся, благое иго Христово на рамена твоя  
вземый.

Радуйся, крепость невидимых врагов  
сокрушивый.

Радуйся, крепости божественныя исполнена  
себе явивый.

Радуйся, яко от козней вражиих нас  
защищаеши.

Радуйся, яко Христу последовати нас  
научаеши.

Радуйся, преподобне Иларионе, отче наш  
милостивый.

#### **Кондак 4**

---

Бурею помышлений сумнительных ни единою  
смущаемь был еси, преподобне, егда вся красная  
мира сего оставив, тесным и многотрудным  
путем к Царствию Небесному шествовати обет  
дал еси, верою мужественно сея бури ярость  
укрощал еси, паки и паки вопия Богу: Аллилуиа.

#### **Икос 4**

---

Слыша глас Господа глаголюща: «Бодрствуйте  
и молитесь, да не внидите в напасть, дух бо  
бодр, плоть же немощна есть», во бдениих и

молитвах непрестанно пребывал еси, всяку напасть теми отгоняя и немощь естества человеческого побеждая. Темже молимся ти: твоими молитвами от всяких напастей избави и нас зовущих ти:

Радуйся, возстания телесная поправый.

Радуйся, на высоту добродетелей возшедый.

Радуйся, воздержанием житие твое украсивый.

Радуйся, блаженную жизнь обретый.

Радуйся, плотския желания постом увядивый.

Радуйся, божественному безстрастию поревновавый.

Радуйся, яко подвигом добрым подвизался еси.

Радуйся, яко веру непоколебимую соблюл еси.

Радуйся, преподобне Иларионе, отче наш милостивый.

### **Кондак 5**

---

Светозарною звездою предносящимся мысленному твоему взору, образом Царствия водим, обитель преподобнаго Евфросина оставил еси и в пустынной дебри при реце

Желче вселился еси, пустынное безмолвие огласив пением: Аллилуиа.

## Икос 5

---

Видя мысленными очима Начальника веры и Совершителя Иисуса, иже вместо предлежащая Ему радости претерпе Крест, всего себе принесл еси Богу жертву живую, чистую, угодную. Мы же, помышляюще подвиги твоя и труды, имиже Господеви хотя угодити, трудился еси, прославляем тя тако:

Радуйся, Царствие Божие внутри себе восхитивый.

Радуйся, в брэнном телеси райскую сладость предвкусивый.

Радуйся, плоти мудрование умертвивый.

Радуйся, духом премудро поживый.

Радуйся, воине Христов добропобедный.

Радуйся, Небеснаго Владыки рабе благий и верный.

Радуйся, яко в радость Господа твоего вшел еси.

Радуйся, яко венец нетленный от Него приял еси.

Радуйся, преподобне Иларионе, отче наш милостивый.

### **Кондак 6**

---

Проповедник богоносный евангелския истины показался еси преподобне Иларионе, не точию бо словом, паче же самым делом дивнаго жития твоего проповедал еси людем, како подобает Господеви служити: в воздержании, в чистоте, в молитвах сердечных и пети Ему: Аллилуиа.

### **Икос 6**

---

Воссиял еси премудростию, яко многосветлое светило, от истиннаго солнца правды Христа озаряемь. Темже мрак неразумия и нерадения находящий на ны, отжени от нас, зовущих ти:

Радуйся, светом божественным просвещенный.

Радуйся, добротою вседетельнаго и Святаго Духа украшенный.

Радуйся, заповедей Господних верный исполнителю.

Радуйся, чистоты душевныя и телесныя строгий блюстителю.

Радуйся, правило веры и благочестия.

Радуйся, яко труждающимся еси предивное  
поможение.

Радуйся, яко скорбящим еси претихое  
утешение.

Радуйся, Озерския веси священное  
украшение.

Радуйся, преподобне Иларионе, отче наш  
милостивый.

### **Кондак 7**

---

Хотя плотских уз свободитися и духом  
пожити, подвигом добрым подвизался еси,  
богоносне: в терпении, в трудах, в пощениих, в  
бдениих непрестанно пребывая. Сего ради,  
видяще добрая твоя дела, прославляем Отца,  
иже есть на Небесех, поюще Ему: Аллилуиа.

### **Икос 7**

---

Новаго подвижника благочестия видеvше тя  
мнози христороубцы, якоже и ты горняго града  
взыскующе, к тебе прихождаху, да под твоим  
водительством поживут благоугодно. Сего ради  
обитель и храм Покрова Пресвятыя Богородицы  
создал еси и был еси наставник иноком

премудрый и игумен добрый. Темже к высоте небесней возведи и нас, поющих ти:

Радуйся, образ терпения еже по Бозе и молитвы непрестанны показуяй.

Радуйся, на небеси, а не на земли сокровище наше искати нас научаяй.

Радуйся, крине райскаго прозябения, в пустыни преславно процветый.

Радуйся, цвете божественнаго саждения, весь Озерскую тобою украсивый.

Радуйся, сосуде божественный воздержания.

Радуйся, богатство некрадомо благочестия.

Радуйся, яко притекающим к тебе спасения еси ходатай.

Радуйся, яко прибегающим к тебе увеселение еси и отрада.

Радуйся, преподобне Иларионе, отче наш милостивый.

### **Кондак 8**

---

Дивное житие пожил еси, преподобне, от юности твоя шествуя трудолюбно по стопам заповедей Господних, и тако старости честныя и седины маститыя достигл еси, всяческими

добродетельми украшен, Богу на всяк день воспевая: Аллилуиа.

## Икос 8

---

Весь Богу освятился еси и еже со Христом быти паче всех вождедел еси. Темже и при скончании жития твоего страха смертнаго чужд был еси: егда же разлучашеся душа твоя блаженная от телесе, тогда светел лицом был еси, и тако радуяся, преставился еси ко Господу, да всегда пребудеши с Ним. Сего ради ублажаем тя звании сими:

Радуйся, нощь жития сего всеумудро  
прошедый.

Радуйся, невечерний день Царствия  
Небеснаго постигнувый.

Радуйся, светом вечныя жизни достойно  
оболкийся.

Радуйся, во блаженных обителех  
божественныя трапезы сподобивыйся.

Радуйся, Духа Святаго святилище  
благолепнейшее.

Радуйся, благодати божественныя сосуде  
чистейший.

Радуйся, яко Господним видением ныне наслаждаешься.

Радуйся, яко Того светлостью невозбранно насыщаешься.

Радуйся, преподобне Иларионе, отче наш милостивый.

### **Кондак 9**

---

Всякое естество ангельское радовашеся о тебе, зря, яко невестественное житие на земли показал еси, и во плоти яко безплотен явился еси, сего ради небесным силам сопричастен, Престолу Господа Царя Славы ныне предстоиши, со ангельскими лики воспевая Ему: Аллилуиа.

### **Икос 9**

---

Витии многовещанная не возмогут изрещи, яже уготова Бог любящим Его: ихже око не виде, и ухо не слыша и яже на сердце человеку не взыдоша. Ты же, блаженне отче, ныне наслаждаяся сих изобильно, не забуди твоею любовью и нас, зовущих ти:

Радуйся, нетленных благ небесных наследниче.

Радуйся, вечныя жизни причастниче.

Радуйся, неизреченную Божию славу присно созерцай.

Радуйся, во свете невещественном непрестанно пребываяй.

Радуйся, райскаго наслаждения умнаго сподобивыйся.

Радуйся, нетленныя и божественныя славы удостоивыйся.

Радуйся, благодатию Божиею недужным исцеление подаеши.

Радуйся, яко силою Вышняго всем нуждающимся вспомоцствуеши.

Радуйся, преподобне Иларионе, отче наш милостивый.

### **Кондак 10**

---

Спасти хотя от отчаяния и пагубы верою к тебе притекающыя, приклонял еси им милосердие Владыки, сего ради отцы наши издревле научишася яко заступника в бедах и напастех и чудотворца предивнаго тя почитати, Богу же чрез тебе чудодеющему воспевати: Аллилуиа.

## Икос 10

---

Стена еси и ограждение всем к заступлению  
твоему прибегающим. Тем же буди стена  
крепкая и ограждение непреоборимое и нам,  
милостиваго твоего заступления просящим и  
почитающим тя звании сими:

Радуйся, немощей наших безмездный  
целителю.

Радуйся, в скорби и печали сущим скорый  
утешителю.

Радуйся, преславный в бедах заступниче.

Радуйся, превеликий в напастех защитниче.

Радуйся, предстателю пред Богом  
непостыдный.

Радуйся, чудесы от Господа прославленный.

Радуйся, яко по успении твоём нас сущих на  
земли не оставляеши.

Радуйся, путеводителю, всех к Небеси  
направляяй.

Радуйся, преподобне Иларионе, отче наш  
милостивый.

---

## Кондак 11

---

Пение дивное слышаша иногда людие и  
свещы горящяя видеша в храме, идеже честныя  
мощи твоя почивают, обители, юже создал еси,  
запустевшей и службе преставшей: сими же  
знаменми возбуждаеши христоименитыя люди,  
да потщатся храм святой возсоздати и службы  
Божия в нем уставити, да верных соборища  
Дивному во святых Богу со умилением  
воспевают: Аллилуиа.

## Икос 11

---

Светоносная память твоя, божественне  
Иларионе, возсия нам пресветлыя лучи  
исправлений твоих: страстей убо наших  
отгоняеши облак и к свету благочестия  
наставляеши нас, иже совершающе память  
твою, верою и любовью блажим, зывающе:

Радуйся, светильниче, огнем божественным  
возженный.

Радуйся, благодатию Божию просвещенный.

Радуйся, заре, верным путь жизни  
освещающая.

Радуйся, звездо, в ноци греховней  
заблудшим сияющая.

Радуйся, благодатных исцелений  
неоскудеваяй источниче.

Радуйся, люте страждущим милостивый  
помощниче.

Радуйся, яко во светлостех святых  
пребываеши.

Радуйся, яко со избранными Божиими купно  
торжествуеши.

Радуйся, преподобне Иларионе, отче наш  
милостивый.

### **Кондак 12**

---

Благодать Пресвятаго Духа испроси нам,  
преподобне Иларионе, у Всещедрого Бога и  
Спаса нашего, вразумляющую и укрепляющую  
нас во спасение, да уклоняющеся от путей  
нечестия и заблуждений, ходим во свете  
заповедей Божиих и тако вечнаго блаженства в  
Царствии Небеснем достигнем, воспевающе  
Богу: Аллилуиа.

### **Икос 12**

---

Поюще славное житие твое, подвиги же  
дивныя и чудотворения, от тебе являемая,  
ублажаем тя, отче Иларионе, яко угодника

Божия преподобнаго и чудотворца предивнаго. Ты же Богу предстоя, присно поминай нас любовью совершающих память священную твою и всечестную, и во смирении зовущих ти таковая:

Радуйся, по достоянию от Господа возвеличенный.

Радуйся, за смиренномудрие от Него превознесенный.

Радуйся, благочестия столпе непоколебимый.

Радуйся, в бедах и напастех сущым поборниче крепкий.

Радуйся, чтущих тя наставниче благодатный.

Радуйся, притекающих к тебе покровителю благонадежный.

Радуйся, яко блаженную жизнь наследовал еси.

Радуйся, яко дар чудотворений от Господа приял еси.

Радуйся, преподобне Иларионе, отче наш милостивый.

## Кондак 13

---

О пресветлый угодниче Христов, преподобне отче наш Иларионе, песненное наше прими приношение и молитвами твоими испроси нам у Господа прощение и оставление грехов и прегрешений наших и велию Его милость, да всяких зол избегше в сей жизни, гибели горькия избавимся и в будущем веце, Царствие же Небесное улучим, со дерзновением воспевающе: Аллилуиа.

Этот кондак читается трижды, затем икос 1-й и кондак 1-й

## Молитва

---

О священная главо, преподобне отче, преблаженне авво Иларионе! Не забуди убогих твоих до конца, но поминай нас всегда во святых твоих и благоприятных молитвах к Богу. Помяни стадо твое, еже сам упасл еси, и не забуди посещати чад твоих. Моли за ны, отче священный, за дети твоя духовная, яко имея дерзновение к Небесному Царю: не премолчи за ны ко Господу, и не презри нас верою и любовью чтущих тя. Поминай нас недостойных у Престола Вседержителя, и не престай моляся о нас ко Христу Богу, ибо дана тебе бысть

благодать за ны молитися. Не мним бо ты суща мертва: аще бо телом и преставился еси от нас, но и по смерти жив сый пребываеши. Не отступай от нас духом, сохраняя нас от стрел вражиих и всякия прелести бесовския и козней диавольских, пастырю наш добрый. Аще бо и мощей твоих рака пред очима нашими видима есть всегда, святая твоя душа со ангельскими воинствы, со безплотными лики, с небесными силами, у Престола Вседержителя престоючи достойно веселится. Ведуще убо ты воистинну и по смерти жива суща, к тебе припадаем и тебе молимся: молися о нас всесильному Богу о пользе душ наших, и испроси нам время на покаяние, да невозбранно преидем от земли на небо, от мытарств же горьких, бесов, воздушных князей и от вечныя муки да избавимся, и Небеснаго Царствия наследницы да будем со всеми праведными, от века угодившими Господу нашему Иисусу Христу; Ему же подобает всякая слава, честь и поклонение, со безначальным Его Отцем, и с Пресвятым и Благим и Животворящим Его Духом, ныне и присно и во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
НЕБО**